

## სტუდენტის აკადემიური რეგისტრაცია

ინდივიდუალური სასწავლო გეგმის ფორმირებისათვის სტუდენტი ვალდებულია სემესტრის დაწყებამდე არაუგვიანეს 1 კვირისა დადგენილი წესით, უნივერსიტეტის სასწავლო პროცესის მართვის ელექტრონულ პორტალზე, გაიაროს აკადემიური რეგისტრაცია.

აკადემიური რეგისტრაციის დროს, ინდივიდუალური სასწავლო გეგმის ფორმირების შემთხვევაში, სტუდენტი ირჩევს მიმდინარე სემესტრში გასავლელ სასწავლო კურსებს საგანმანათლებლო პროგრამის სასწავლო გეგმაში შემავალ ყველა მოდულიდან. კერძოდ:

- საბაზისო სასწავლო კურსების მოდულიდან (სავალდებულო/არჩევითი);
- უცხო ენის მოდულიდან (სავალდებულო);
- სპეციალობის სასწავლო კურსის მოდულიდან (სავალდებულო/არჩევითი);
- სპეციალობის კონცენტრაციის მოდულიდან (სავალდებულო/არჩევითი) არსებობის შემთხვევაში;
- თავისუფალი კონცენტრაციის მოდულიდან (არჩევითი);
- პროფესიული პრაქტიკა (სავალდებულო);
- საბაკალავრო/სამაგისტრო ნაშრომი (სავალდებულო).

სტუდენტს უფლება აქვს აირჩიოს ნებისმიერი სასწავლო კურსი ნებისმიერი მოდულიდან (მოდულით განსაზღვრულ კრედიტების დიაპაზონში), გარდა იმ სასწავლო კურსებისა, რომელთა შესწავლის წინაპირობა მას არ აქვს დაძლეული მიმდინარე სემესტრის დაწყებამდე.

საგანმანათლებლო პროგრამის გეგმით გათვალისწინებულ ვადაში დაძლევის გარანტიისთვის სტუდენტს შეუძლია ისარგებლოს ე.წ. ტიპური სასწავლო გეგმით, რომელიც შედგენილია პროგრამის ხელმძღვანელის მიერ. ინდივიდუალური სასწავლო გეგმის ფორმირების შემთხვევაში რეკომენდირებულია პირველ რიგში სტუდენტმა აირჩიოს მიმდინარე სემესტრის სავალდებულო სასწავლო კურსები, უცხო ენის მომდევნო დონის კურსი, ჩარჩენილი სავალდებულო კურსები (ასეთის არსებობის შემთხვევაში) და მხოლოდ შემდეგ არჩევითი კურსები.

რეკომენდირებულია არჩევნის გაკეთებამდე სტუდენტი გაეცნოს:

- აკადემიური რეგისტრაციისთვის წარმოდგენილ სასწავლო კურსების შესწავლის წინაპირობებს;
- პროგრამის არჩევით კომპონენტებს (სასწავლო კურსი/მოდული);
- სასწავლო ჯგუფების სალექციო დროს;
- რეგისტრაციის გავლის პროცედურას.

სპეციალობის კონცენტრაციის არჩევაზე სტუდენტი დაიშვება მეხუთე სასწავლო სემესტრიდან. წინა სემესტრის სასწავლო კურსებზე რეგისტრირებულ სტუდენტებს კონცენტრაციის არჩევის ველი არ გამოუჩნდებათ.

აკადემიური რეგისტრაციის დროს სტუდენტი განსაზღვრულ ვადამდე ვერ ირჩევს პრაქტიკასა და საბაკალავრო/სამაგისტრო ნაშრომს. ეს კომპონენტები მას ავტომატურად გენერირდება.

კონკრეტული კონცენტრაციის არჩევის შემდეგ კონცენტრაციის კურსების არჩევა ხდება ძირითადი კურსების არჩევის წესის იდენტურად. კონცენტრაციის სავალდებულო და არჩევითი კურსების არჩევა ხდება იმ ოდენობით, როგორც ეს გათვალისწინებულია პროგრამის სასწავლო გეგმით.

სტუდენტს უფლება აქვს აირჩიოს სასწავლო კურსები თავისუფალი კრედიტების ხარჯზე - ამ შემთხვევაში მნიშვნელობა არ აქვს, თუ რომელ სასწავლო სემესტრზეა რეგისტრირებული სტუდენტი.

სტუდენტს უფლება აქვს თავისუფალი კრედიტების ფარგლებში აირჩიოს უნივერსიტეტში მოქმედი სხვა ნებისმიერი საგანმანათლებლო პროგრამის სასწავლო კურსი/კურსები.

თავისუფალი კრედიტების რაოდენობა შესაძლებელია შემცირდეს თუ:

- მობილობით/შიდა მობილობით გადმოსულ სტუდენტს განსხვავებული კრედიტები უღიარდა თავისუფალ კრედიტებში;
- სტუდენტს უცხო ენის ასათვისებლად დაჭირდა სემესტრების ნაკლები რაოდენობა.

საგანმანათლებლო პროგრამით გათვალისწინებული სასწავლო კურსების არჩევანის გამჭვირვალობის მიზნით, სტუდენტს შეუძლია და აქვს საშუალება გაეცნოს საგანმანათლებლო (კურიკულუმი) და სასწავლო კურსის პროგრამებს (სილაბუსი).

საგანმანათლებლო პროგრამის და სილაბუსების წინასწარ გაცნობა შესაძლებელია უნივერსიტეტის ვებ-გვერდზე (საგანმანათლებლო პროგრამები და კატალოგი).

ინდივიდუალური სასწავლო გეგმის ფორმირების პროცესში სტუდენტს შეუძლია ისარგებლოს ტუტორების (აკადემიური კონსულტანტების) დახმარებით.

ინდივიდუალური სასწავლო გეგმის ფორმირებისას სტუდენტი სრულად ითვალისწინებს სასწავლო კურსებს, რომლებიც ჩამოთვლილია არჩეული სასწავლო კურსის სილაბუსების შესწავლის წინაპირობაში.

ინდივიდუალურ სასწავლო გეგმაში კრედიტების რაოდენობა წელწადში სასურველია არ აღემატებოდეს 60-ს (სემესტრში 30-ს). გამონაკლის შემთხვევაში შესაძლებელია ერთ სასწავლო წელში დამატებითი 15 კრედიტის დაგროვება.

სტუდენტს, ინტერნეტის ქსელში ჩართული ნებისმიერი კომპიუტერიდან შეუძლია შევიდეს სასწავლო პროცესის მართვის სისტემის ვებ-გვერდზე ([www.gttu.ini.ge](http://www.gttu.ini.ge)) საკუთარი სახელის, გვარისა და საიდენტიფიკაციო პაროლის მითითებით.

სტუდენტი საიდენტიფიკაციო პაროლს იღებს აკადემიურ რეგისტრაციამდე.

პაროლის აღსადგენად სტუდენტს შეუძლია მიმართოს ფაკულტეტის დეკანის მოადგილეს.